

Date – 30/07/2025

Time - 7:30 -7:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Labour, Employment, Skill Development & Entrepreneurship Department "SKILLS ON WHEELS" chu nimin khan LESDE Minister Pu Lalnghinglova Hmar chuan a hawng.
2. Aizawl leh Silchar inkar kawngpui National Highway kawngchhiaah bungrua a tangkhang nasa a, hemi avang hian nitin eitur supply a vang chho mek.
3. Prime Minister Narendra Modia chuan khawvel ram hruaitu tumahin Operation Sindoor chu titawp tura an nawr loh thu Lok Sabha-ah a sawi.
4. Union Education Minister Dharmendra Pradhan chuan National Education Policy (NEP) 2020 chu ram changkang ni tura kawng zawh mekna Vikshit Bharat 2047 ah a kalkawng pawimawh tak a ni chho mek a ti

<><><>

SKILLS ON WHEELS

Labour, Employment, Skill Development & Entrepreneurship Department "SKILLS ON WHEELS" chu nimin khan LESDE Minister Pu Lalnghinglova Hmar chuan a hawng a,

Pu Lalnghinglova hmar chuan hei hi Mizoram tana thil tangkai tak a nih a rin thu a sawi a. Thil thar niin tun hi a bultanna chauh la nimahse a phurawm hle tih a sawi.

Minister chuan, Mizote hian skill chu an nei mai zel a, mahse eizawna a hmang tur chuan sawrkar pawmpui te a ngai thin a. A bikin thingtlang tan he hmalakna hi a tangkai dawn a. Skill Development kalpui department dang tan a pawh a tangkai ang a ti a. Sawrkar laipuiin Skill Development a tuipui a, LESDE hi department pawimawh a ni chho dawn a ti.

“Skills on Wheels” hi sorkar laipui Ministry of Skill Development and Entrepreneurship (MSDE) hnuaia project pakhat SANKALP scheme State Incentive Grant (SIG) 2 hnuaia a hmuh a ni a. Skills on Wheels vehicle a tan hian lirthei 2 hman niin, he Bolero Camper hi GeM portal atangin Mahindra and Mahindra Limited, Mumbai atang a lei a ni.

“Skills on Wheels” vehicle hi a bik a duan, Skill Development training na bungrua/hmanrua hrang hrang phur thei tur a ruahman a ni a, Mobile Training Centre tur ang a ruahman a ni a, A tum bul pui ber chu Skill Development/Vocational training job role thlan chhuah bik te thingtlang khaw hla tak tak leh kilkhawr zawk, Skill development training hrang hrang dawng pha ve lo te hnen ah skill development training pek hi a ni a. “Skills on Wheels” ah hian a bul tan na a tan Asst. Electrician training leh Mason General training te pek phawt tur a ruahman a ni a, heng bakah hian training job role hrang hrang te pawh a tul dan anga kal pui zel tur a ruahman a ni. “Skills on Wheels” hi Training Equipments engemaw zat phur thei tur a ruahman a ni bawh.

<><><>

CYMA

Central YMA Executive Committee thukhawmin, tunhnaia state thenawm, Assam-a dan lova Bangladesh atanga awm, hnawh chhuahte chu Mizorama an lo luh loh nan sorkar chu ruahmanna siam thuai a, ILP pek chhuah kawngah fimkhur lehzuat turin an ngen.

An thuchhuah tarlan danin, Thawhtan zana Central YMA Executive Committee thukhawm chuan, tunhnaia state thenawm, Assam-a dan lova Bangladesh atanga awm te hnawh chhuah an nih avanga lo inven dan tur a ngaihtuah a. Assam atanga hnawh chhuah te chu thenawm state ah te an luh lohna turin hma an la mek hlawm a. Mizoramah pawh engemaw zatrawn lut ve thei an nih avangin, lo inven dan turah Sawrkarin ruahmanna a la siam lo a nih chuan, siam thuai tur leh ILP pek chhuah kawngah pawh fimkhur leh zuat turin an ngen tih an sawi a. State dang atanga dan lo a lo lut te ven kawngah ramri a awm Sub-Headquarters, Group leh Branch YMA te pawh a tul anga hma la turin an inhriattir bawh tih an sawi a ni.

PC Party pawhin thuchhuah siamin, Assam in an ram a dan lo a awm, Bangladesh atanga lut te hnawt chhuak turin hma a lak mek avangin Meghalaya, Nagaland leh Manipur state sorkar te chuan Assam atanga hnawhchhuah te an state-a an luh lohna tura inbuatsaihna an kalpui bakah an rama dan lova awm te laka hmalak dan tur an ngaihtuah mek bawh a ti a. Hemi avang hian Mizoram sorkar leh mipui pawh inralrin a, hma lak ve thuai a ngai an ti.

Mizoramah hian Bangladesh atanga dan lova lo lut an tam hle tih sawiin PC Party chuan, PC Party kaihhruai sorkarin Bangladesh atanga dan lova rawn lut a hnawhchhuah hnuah khan sawi thama sorkar hmalakna a awm tawh lo an ti a. Tunah hian Assam-ah dan lova awm mi nuai 29 aia tam an awm nia ngaih a ni a. Heng ho hi an hnawtchhuak a nih a, Mizote an rawn chim chuan buaina a thleng thei an ti a ni.

(Corr)

<><><>

SUPPLIES

Aizawl leh Silchar inkar kawngpui National Highway kawngchhiaah bungrua a tangkhang nasa a, hemi avang hian nitin eitur supply a vang chho mek.

Akashvani corr sawi danin, tun dinhmunah Aizawl ah chuan phai lam atanga laklulh thlai leh eitur hrang hrang a vang chho tan a, bawnghnute thlengin leitur a vang chho mek a ni.
Kawnpui leh Sairang inkar kawng siam mek lai hian lirthei lian ruak te chu kal hmasak tir an ni a, tuialhthei phur oil tanker leh eirawngbawlina gas phur lirthei te chhuah an ni bawk a, Aizawl-ah phurh thlen mek a ni a, nimin lamah buhfai leh dawr bungraw phur thenkhatte chhuah an ni bawk a ni.

Mizoram Truck Driver's Association President Pu H Laldingliana chuan Lirthei chhuak zat tak chu hriat theih ni lo mah se, Mizorama mi tur vek te ni lovin ram thenawm, Myanmar leh state thenawm Manipur a kal tur te a ni a ti a, kawng a that tawh loh avangin lirthei a tlan chak thei lova, kawngpui chu siam lai a nih bakah ruah a sur chuan lirthei tan tuang taka kal a harsa a ti a, khua a that pangngai chuan an kal tluan theih a beisei thu a sawi bawk a ni.

Hetihlai hian Lirthei hmanga eizawng pawl 14-in Mizoram chak lakna kawngpui chhia dinhmun an enfiah a, an kal zel dan tur vawiin hian an rel dawn a ni.

Lirthei hmanga eizawng pawl hian kar kalta Thawhlelnia an rorel bawhzuiin, Mizoram chak lakna kawngpui chhia siam mek dinhmun hi an enfiah a, Langkaih kawng, Sairang leh Kawnpui inkar leh Kolasib leh Bairabi inkar kawng chhia siama Mizoram Sorkar leh HNIDCL hmalak dan an enfiah a ni. An sawi danin, kawng chhe lai chu khawih ni mah se, an duhthusam erawh a ni lo a, hnathawktu leh khawl an tlem bakah lirthei chevel thununna, traffic management a that loh avangin lirthei tam tak an la tang an ti a ni.

Nimin khan Agriculture Minister Pu PC Vanlalruata leh Pu Lalmuanpuia Punte, MLA & Adviser to CM te chuan Kawnpui leh Sairang inkar kawng siam mek a hmunah an vil a; hnathawktute chu tha tak leh ngawrh taka hna thawk turin an fuih a, NHIDCL leh PWD te chu lungrual taka thawk tur leh a tul anga intawiawm tha turin an ti bawk.

<><><>

INTNL TIGER DAY

International Tiger Day pualin Kawrthah Forest Division leh Kawrthah GSA te tawngkawp chuan nimin khan thalai leh khawtlang mipui pungkawm te hnenah ramngaw leh nungcha humhalh pawimawhna inzirtirna hun GSA Playground, Kawrthah ah an hmang.

Kawrthah Forest Division DFO Pu Karthikeyan V chuan he hun hi hmanpuiin thalai rualte chu nungchate humhalhna ngaipawh a an chhung leh thenrual thate hnenah nungchang humhalh pawimawhna blanchhawng turin a fuih a, thalai rualte chu sa pel lo tur leh, sa pel turte pawh ti lo tura hrilh thin turte, nungchatehumhalh kawnga Forest Department hmalakna tawiawm theuh turin a sawm bawk a ni.

Kawrthah Forest Division hi Dampa Tiger Reserve Buffer Zone a awm a nih avangin Sakei humhalh kawngah pawh dinhmun pawimawh tak a chelh a. He hunah hian Zone Football Tournament khelh mek chu behchhanin football match huaihawt a ni a, he hun kaltlang hian mipui tam thei ang ber hnena ramngaw leh nungcha humhalh zirtirna hi kalpui a ni.

(DIPR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

OPERATION SINDOOR

Prime Minister Narendra Modia chuan khawvel ram hruaitu tumahin Operation Sindoor chu titawp tura an nawr loh thu Lok Sabha-ah a sawi.

Nimina Operation Sindoor chungchang sawihonaah Opposition lamin US nawrna avanga Pakistan nen inkahhai puang anga an puhna chhangletin Pu Modia chuan he thu hi a sawi a. Pakistan zawkin Operation Sindoor chu titawp tura a ngen thu leh an tawrh zawh tawh loh thu an sawi a ti a. He Operation hmang hian India chuan Pahalgam firfiaka inbeihna chu na takin a chhanglet tih sawiin Pakistan in nuclear hmanga a vauna pawh a hlau lo tih khawvel hmuhah a puang a ni a ti bawk.

Hetihlai hian Leader of Opposition Rahul Gandhi chuan na taka Pakistan beiin lainatna tel hauh loin pawl an khawih a ti a. Operation Sindoor neih chhungin opposition te chuan sawrkar an thlawp tlat tih a sawi bawk a ni.

(Newsonair)

<><><>

NEP

Union Education Minister Dharmendra Pradhan chuan National Education Policy (NEP) 2020 chu ram changkang ni tura kawng zawh mekna Vikshit Bharat 2047 ah a kalkawng pawimawh tak a ni chho mek a ti. Nimina New Delhi-a NEP 2020 kum 5 tlin puala Akhil Bharatiya Shiksha Samagam 2025 ah he thu hi sawiin Pu Pradhan-a chuan NEP chuan ramchhung zirna kalphungah harhtharna a rawn thlen tih sawiin sawrkarin hlawhtling takin NEP chu classroom, campus leh community ah a hruailut a ni a ti.

NEP hi Mizoramah pawh kalpui chhoh mek niin zirbingna leh mihring hman tlaka chherchhuah chu a tum zinga pakhat a ni a. \

Kan Correspondent zawhna chhangin Dr.Daniel Lalawmpuia, Assistant Professor PUC chuan a hmathlir hi la thleng pha lo mah ila, Mizorama college hrang hrangte chuan Value Added Course an zir tan tawh a ni a ti a.

Mihring hmantlaka chher chhuak tur chuan a bulpui chu zirna a ni a, zirna kalpui hi a namai lova a sum hrawm pawh a na a ni a, thildanga hmanral a ni lova peipunna tha tak a ni a ti.

India skill report tarlan danin India rama graduate zaa 45 vel bawr bak chhawr nghal theih an ni lo a, hetih lai hian ram thenkhat, UK, Japan, South Korea chuan mihring hmantlak zaa 80 chuang te an nei a, hemi ti tur hian NEP hnuaiah hmalak mek a ni a, themthiamna tihpun a ni dawn a ni a ti.

(PIB)

<><><>